



KHUTBAH JUMAAT: “WABAK DICEGAH KESIHATAN DISYUKURI”



الْحَمْدُ لِلَّهِ الْقَائِلِ :

وَمَا كَانَ رَبُّكَ لِيُهْلِكَ الْقُرَىٰ بِظُلْمٍ وَأَهْلُهَا مُصَلِحُونَ
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ، اللَّهُمَّ صَلِّ
وَسَلِّمْ عَلَىٰ سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Sidang jemaah yang dimuliakan,

Marilah kita meningkatkan tahap ketaqwaan kita kepada Allah SWT dengan konsisten melaksanakan segala suruhan-Nya dan meninggalkan segala larangan-Nya. Mudah-mudahan kita semua dibangkitkan dalam kalangan orang yang bertaqwa di akhirat kelak.

Islam sebagai agama yang membawa kerahmahtan menuntut agar umatnya sentiasa memelihara kesihatan tubuh badan dan diwaktu yang sama menghindari sebarang penyakit. Justeru, tajuk khutbah pada hari ini ialah, “Wabak Dicegah, Kesihatan Disyukuri”.

Sidang jemaah yang berbahagia,

Syariat Islam diturunkan untuk mendokong gagasan *Maqasid As-Syar'iah* yang lima iaitu memelihara kesucian agama, nyawa, ketinggian akal, harta dan keturunan. Dalam aspek memelihara nyawa, Islam amat menitikberatkan umatnya agar menjaga nikmat kesihatan tubuh badan yang dikurniakan oleh Allah SWT. Ia merupakan suatu amanah daripada Allah SWT yang perlu diberi perhatian khusus oleh setiap hamba-Nya bertujuan agar pelaksanaan ibadah kepada Allah SWT dapat dilakukan dengan penuh kualiti dan pada tahap yang terbaik.

Justeru, Islam menganjurkan umatnya agar menjauhi perkara yang membinasakan diri. Allah SWT tidak akan sekali-kali menimpakan sebarang musibah melainkan disebabkan oleh perbuatan manusia yang suka melakukan kerosakan, sesuai dengan firman Allah SWT menerusi Surah Hud, ayat 117 yang bermaksud :

“Dan tuhanmu tidak sekali-kali hendak membinasakan mana-mana negeri dengan sebab kezaliman penduduknya, selagi mereka sentiasa memperbaiki keadaan sesama sendiri.”

Muslimin yang dirahmati Allah,

Seperti mana yang kita sedia maklum bahwa dunia masa kini berhadapan dengan ujian penularan wabak pandemik COVID-19 yang secara umumnya memberi kesan kepada gaya hidup dan menjejaskan ekonomi dunia. Sehingga kini, Kementerian Kesihatan Malaysia (KKM) telah mencatatkan lebih daripada 190,000 bilangan kes dan mencatatkan sebanyak lebih daripada 700 kematian. Statistik ini sangat membimbangkan dan kerajaan Malaysia telah melakukan pelbagai inisiatif untuk memutuskan rantai COVID-19 ini dengan melaksanakan Perintah Kawalan Pergerakan (PKP), Perintah Kawalan Pergerakan Bersyarat (PKPB) dan Perintah Kawalan Pergerakan Pemulihan (PKPP).

Dalam hal ini, Islam sebagai agama rahmah telah memperkenalkan konsep pencegahan penyakit. Imam Al-Bukhari RA telah meriwayatkan hadis daripada Sa’ad bin Abi Waqqas RA, bahawa Nabi SAW telah bersabda:

مَنْ تَصَبَّحَ بِسَبْعِ تَمْرَاتٍ عَجْوَةً لَمْ يَضُرَّهُ ذَلِكَ الْيَوْمَ سُمٌّْ وَلَا سِحْرٌ

Maksudnya: *“Sesiapa yang memakan tujuh biji tamar ‘ajwah pada waktu pagi, nescaya dengan demikian, dia tidak akan dimudaratkan pada hari itu oleh racun dan sihir.”*

Hadis tersebut mengandungi prinsip penting dalam pencegahan penyakit yang kita kenali pada hari ini sebagai imunisasi. Dalam menghadapi berbagai jenis

penyakit khususnya penyakit berjangkit, perkembangan teknologi dalam perubatan moden menjadikan manusia mampu untuk menghindari penyakit-penyakit tersebut.

Muslimin yang dirahmati Allah,

Kerajaan Malaysia seperti yang ditegaskan oleh YAB Perdana Menteri Malaysia, Tan Sri Muhyiddin Yassin pada 22 Disember 2020, berusaha untuk meningkatkan pembelian vaksin COVID-19 agar boleh menampung keperluan imunisasi sehingga melebihi 80 peratus rakyat. YAB Perdana Menteri juga memaklumkan bahawa vaksin COVID-19 akan diberikan secara percuma kepada rakyat Malaysia.

Selaras dengan pendirian pihak kerajaan, Mesyuarat Khas Jawatankuasa Muzakarah Majlis Kebangsaan Hal Ehwal Ugama Islam (MKI) Kali ke-10 yang bersidang pada 3 Disember 2020, telah mengambil ketetapan bahawa hukum penggunaan vaksin COVID-19 adalah harus dan wajib diambil oleh golongan yang ditetapkan oleh kerajaan Malaysia. Ketetapan ini juga telah disebarkan maklum kepada Majlis Raja-Raja.

Penggunaan vaksin bagi melindungi manusia daripada dijangkiti penyakit berbahaya bukanlah perkara asing dalam perspektif syarak. Ini terbukti, kaedah pencegahan melalui vaksinisasi dapat dilihat dalam enam keputusan yang mengharuskan penggunaannya oleh Jawatankuasa Muzakarah Fatwa MKI daripada tahun 1988 hingga 2013, iaitu Pelalian Rubela (Imunisasi Rubela) pada tahun 1988, Imunisasi Hepatitis B pada tahun 1988, Imunisasi Campak, Tibi, Batuk Kokol, Dipteria, Tetanus dan Polio pada tahun 1989, Pelalian Vaksin Meningococcal Meningitis pada tahun 2002 dan dipinda keputusannya pada 2014, Vaksin Human Papilloma Virus (HPV) pada tahun 2010 dan Vaksin Meningitis Menveo pada tahun 2013.

Justeru dalam isu pengambilan vaksin COVID-19 ini, ia merupakan ketetapan yang diambil oleh pihak kerajaan. Ini kerana, pihak kerajaan dituntut memutuskan

sesuatu keputusan yang paling mendatangkan masalah kepada keseluruhan rakyat, setelah menimbangtara faktor-faktor yang pelbagai serta setelah mendapatkan pandangan-pandangan daripada pihak-pihak yang berkepakaran dan juga berautoriti. Ini berdasarkan sebuah kaedah fiqh yang masyhur:

تَصَرُّفُ الْإِمَامِ عَلَى الرَّعِيَّةِ مَنْوُوطٌ بِالصَّلَاحَةِ

Maksudnya: “*Urus tadbir pemerintah ke atas rakyat adalah terikat dengan masalah.*”

Dalam konteks ini, pemerintah berhak membuat keputusan berpandukan kepada kemaslahatan rakyat dengan berlandaskan kepada tuntutan syariat Islam. Sehubungan itu, selagi arahan pemerintah itu dilakukan untuk masalah rakyat serta tidak bercanggahan dengan perintah Allah SWT, maka menjadi kewajipan kepada seluruh rakyat untuk mematuhi arahan tersebut. Ini berdasarkan firman Allah SWT dalam Surah An-Nisa ayat 59:

يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولَى الْأَمْرِ مِنْكُمْ

Maksudnya: “*Wahai orang-orang yang beriman, taatlah kamu kepada Allah dan taatlah kamu kepada Rasul serta (taatlah kamu) kepada golongan ulil amri dari kalangan kamu.*”

Meskipun begitu, ketaatan ini terikat selama mana arahan tersebut tidak bercanggah dengan perintah Allah dan Rasul-Nya SAW dalam erti kata lain, ketaatan hanyalah pada perkara yang makruf dan tidak pada perkara maksiat. Ini berdasarkan sebuah hadis yang diriwayatkan daripada Rasulullah SAW, baginda bersabda:

لَا طَاعَةَ فِي مَعْصِيَةِ اللَّهِ إِثْمًا الطَّاعَةُ فِي الْمَعْرُوفِ

Maksudnya: “*Tidak ada ketaatan pada kemaksiatan kepada Allah SWT. Sesungguhnya ketaatan itu hanyalah pada perkara yang makruf.*”

Muslimin yang dirahmati Allah,

Kesimpulan yang dapat diambil daripada khutbah hari ini ialah:

1. Menjadi tuntutan kepada kita untuk merawat penyakit. Begitu juga, mengambil jalan pencegahan terlebih dahulu sebelum terkena wabak atau sebarang penyakit. Antara lain dengan menggunakan suntikan vaksin COVID-19. Oleh itu, setiap langkah yang dilakukan itu merupakan suatu rawatan terhadap takdir Allah dengan menggunakan takdir-Nya yang lain. Ia sama sekali tidak bermaksud menolak takdir Allah SWT ini seperti yang disebutkan oleh Saidina Umar Ibn Al-Khattab RA:

نَفَرٌ مِنْ قَدَرِ اللَّهِ إِلَى قَدَرِ اللَّهِ

Maksudnya: “Kita lari daripada takdir Allah SWT menuju kepada takdirnya (yang lain).”

2. Termasuk dalam proses rawatan adalah dengan mencegah sesuatu penyakit sebelum ia menimpa. Inilah konsep yang terdapat pada pengambilan vaksin. Iaitu sebagai langkah pencegahan untuk mengelakkan seseorang daripada ditimpa penyakit. Hal ini telah diterima ramai oleh pakar dunia termasuk WHO dan kementerian kesihatan seluruh negara di dunia ini.

3. Sebarang usaha mencegah dan merawat penyakit berjangkit seperti COVID-19 adalah lebih ditekankan kepentingan dan keperluannya. Ini kerana, sekiranya ia tidak dirawat dan dicegah ia akan menyebabkan kemudharatan yang terhasil daripadanya menjadi lebih meluas. Sedangkan kaedah fiqh menyebut:

لَا ضَرَرَ وَلَا ضِرَارَ

Maksudnya: “Tidak ada sebarang mudarat dan tidak ada juga perbuatan membalas kemudharatan.”

4. Berkenaan dengan hukum penggunaan vaksin COVID-19, selama mana telah dipastikan bahawa tidak terdapat sebarang bahan-bahan haram yang digunakan

dalam penghasilan vaksin tersebut, maka hukum asal pengambilannya adalah harus. Sekiranya pengambilan vaksin tersebut terbukti berkesan dalam mencegah penyakit serta ternafi sebarang kemudaratan daripadanya, maka hukum pengambilannya adalah dituntut bahkan menjadi kewajiban apabila ditetapkan oleh pihak pemerintah.

5. Dalam masa yang sama, sekiranya pemerintah membuat ketetapan mewajibkan pengambilan vaksin COVID-19 ini kepada seluruh rakyat, khususnya kepada mereka yang terdedah dengan risiko jangkitan seperti pejuang barisan hadapan (*frontliners*) serta golongan yang berisiko, maka menjadi kewajipan untuk kumpulan ini mengambalnya.

اللَّهُمَّ إِنَّا نَعُوذُ بِكَ مِنَ الْبَرَصِ ، وَالْجُنُونِ ، وَالْجُدَامِ ، وَمِنْ سَيِّئِ الْأَسْقَامِ

Maksudnya: “Ya Allah kami berlindung dengan mu daripada penyakit sopak, gila, kusta dan penyakit-penyakit yang buruk.”

اللَّهُمَّ جَنِّبْنَا مُنْكَرَاتِ الْأَخْلَاقِ ، وَالْأَهْوَاءِ ، وَالْأَسْوَاءِ ، وَالْأَدْوَاءِ

Maksudnya: “Ya Allah jauhkanlah kami daripada akhlak yang mungkar, hawa nafsu yang mungkar, juga daripada segala keburukan serta daripada penyakit-penyakit yang membawa kepada kebinasaan.”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.